



DEN PRESENCIA DI E FIGURA PRINCIPAL MES Y UN CANTIDAD GRANDI DI HENDE A HACI DESVELO DI CAYA OSCAR WYATT JR. NA SAN NICOLAS



UN gran cantidad di hende a acudi n'e ceremonia na unda e desvelo di Caya Oscar Wyatt Jr. a tuma lugar. Entre esnan presente tabatin e protagonista sr. Oscar Wyatt mes, su señora Lynn, yiunan Trey Wyatt y señora Mervin y Steve Wyatt. Parlamentarionan di tanto partido AVP como MEP a haci acto di presencia, ex empleadonan di Coastal, miembronan di San Nicolas Business Association y varios otro invitado, amigo y conocinan di famia Wyatt.

E ceremonia a cuminsa cu e himno nacional di Merca sigui p'esun di Aruba canta pa Edjean Semeleer. Pa motibo

cu 4 aña pasa sr. Oscar Wyatt a haya un stroke, e por a dirigí solamente un par di palabra n'e publico, pa despues laga su señora Lynn hiba palabra den su nomber. Lynn Wyatt a bisa cu aunke cu su casa no por papia bon, e ta compronde tur loke ta pasa rond di dje y a keda cu un aprecio y interes grandi pa Aruba. Den nomber di su famia el a gradici Gobierno di Aruba pa e honor cu su casa a ricibi.

Minister Mike de Meza a conta cu sr. Oscar Wyatt tabata su dunador di trabou. Un hefe 'tough', pero semper 'fair' pa su empleadonan. Tin bes e tabata bin incognito Aruba, yega trabou den un

Tercel pa mira si e trabou tabata wordo bon haci y tabata duna un muestra di aprecio si e tabata satisfecho.

Prome Minister Mike Eman a hiba un discurso elocuente dunando CEAR loke ta di Cesar. El a reconoce e curashi di sr. Wyatt pa a bin Aruba na 1989 y hiba deliberacionnan te pa yega na habri e refineria na 1991.

P'esaki e ta reconoce e bon trabou haci dor di ex Prome Minister Nelson Oduber, kende a tempo ey a percura pa Coastal por a establece su mes na Aruba. Eman a duna honor tambe na su ruman Henny Eman, kende tabata Prome Minister den

e periodo cu a sigui y sin duda tambe a haci un bon trabou den duna Coastal un tax holiday pa por a construi e di dos delay coker cu a haci e refineria mas competitivo ainda.

"Historia a demostra cu e decisionnan tuma e temponan ey tabata bon decisionnan", asina Eman a bisa.

Despues a bay over pa e ceremonia di desvelo di e borchí cu e nomber di Caya Oscar Wyatt Jr. Un momento emocional sigur pa sr. y sra. Wyatt, nan yiunnan presente y tur cu a conoce sr. Wyatt di cerca y a traha cu ne durante su añanan na Aruba. Un honor bon mereci.